

EUROPA

Hauek dira aste honetan Europako nabigatzaileen artean arreta erakarri duten gaietako batzuk:

> Karramarroak

Zer egin, haien haragia jan ostean karramarroen soberakinekin? Nola birziklatu European urtero sortzen diren milaka tona karramarro azalak? Bavariako laborategi batean ikerlariak karramarro maskorak errendimendu handiko biopolimero bihurtzeko ahaleginetan ari dira. Azken batean biofindegi batean bezala egiten dute lan. Maskorretan dagoen kitina sustantzia da ikertzaileek bereizten dutena; ostean, kitina tratatu egiten dute plastikoak lortzeko.

> Ardoa

Kontsumitzaile estatubatuarrek gero eta ardozaleagoak dira. Ardoaren eta Mahastien Nazioarteko Erakundearen arabera, azken urteetan ardo kontsumoak beheranzko joera izan badu ere, AEBetan 29,1 milioi hektolitro kontsumitu zituzten iaz, aurreko urtean baino %0,5 gehiago. Datu horrekin, lehen postua kendu diote Estatu frantsesari: ardo kontsumoak 7 puntu egin du behera bertan. Hirugarren dago Alemania, kontsumoan behera egin duen EBko herrialde bakarra.

> Kalifornia

Sutik ihes egiteko, milaka kaliforniarrek beren etxeak utzi behar izan dituzte. Kaliforniak inoizko lehorterik handiena bizi du, eta horri aste honetan izandako beroa eta haizea gehitu zaizkio. Suhiltzaileak sutea kontrolatzeko lanetan ari dira, baina lan zaila dute, haize bolada indartsuak dituztelako. Suteak asteartean hasi ziren San Diego hiritik gertu, baina zabaldu eta makina bat herri kaltetu ditu dagoeneko, besteak beste, Santa Barbara inguru ezaguna.

> Quixter

Kreditu txartelak iraganeko gailu bilaka daitezke aurki. Suediako Lund hiriko unibertsitateko ikasle talde batek ordainketak egiteko sistema biometriko berri bat asmatu du. Sistema horri esker ordainketak aparailu bat eskuekin presionatuz eta mugikorrereko azken lau zenbakiak sartuta egin daitezke. Quixter izenarekin bataiatu dute eta sortzaileak, batez ere, jendea denbora aurrezteko modua emango diola uste du. Ideia pagatzeko ilaran zegoela izan zuela aitortu du.

> Turkia

Aste honetan Turkiara begira egon da nazioartea. Inoiz herrialde honetan izan den meatzaritza istripu larrienak ehunka hildako utzi ditu Soma herrian. Leherketaren unean 787 pertsona ari ziren lanean eta ostegunean eman zieten lurra meatzetik ateratako lehendabiziko gorpuei. Sindikatuek istripua gertatu eta berehala utzi nahi izan zuten agerian Turkian, «beste hainbat herrialdetan bezala, meatzaritza arloan segurtasun neurrien gabezia larria» dagoela.



KUTXATEKA.COM

DONOSTIAKO KAIRAINO IRITSI ZEN MARRAZOA

1951. urteko otsailean marrazo bat agertu zen Donostiako kaiaren inguruetan. Lanak izan zituzten uretatik ateratzen, ez alferrik 3,5 metro luze zen eta 350 kilo pisatzen zituen. Pentsatzekoa da erdi gaixo edo egongo zela marrazoa, bestela ez zen-eta hain otzan ibiliko! **Paco MARI. MARIN FUNTSA. KUTXA FOTOTEKA**